

TEZĂUR LITURGIC
2 IULIE

ACATISTUL
MAICII DOMNULUI
PUNEREA ÎN RACLĂ
A VEȘMÂNTULUI



MOSCOVA, 2000



Акафист

Положения честныя Ризы Пресвятыя Богородицы

Кондак 1

Взбранной Воеводе, Царице небеси и земли,
даровавшей нам благодать и силу, честныя
твоя Ризы положения — память творити,
благодарственное приносим пение, от бед и
наветов злых нас покрывающей. Не отвержи нас
от Лица Твоего Милосердная Мати, но прими
нас с любовью вопиющих Тебе:
Радуйся, Богородице, Ризою Твоею от злых
наветов нас покрывающая.

Икос 1

Ангельский глас прииде во слух Святыя Анны
известующ: ты зачнеши и родиши дочь,
Преблагословенную Марию, от Нея же
благословятся вся племена земная и придет
спасение миру всему. Сие введуще возопиим
Богородице благодарственне:
Радуйся, Бога Отца безначального предвечное
благоволение;
Радуйся, Бога Сына Безлетнаго пречистое
вместилище.
Радуйся, Бога Духа Всесвятаго избранное
жилище;

Радуйся, Горних чинов ангельских
непрестающее удивление.

Радуйся, темных сил адских всегрозное
устрашение;

Радуйся, Юже на воздухе сретают многоочитии
Херувими.

Радуйся, Ей же похвальная восписуют
шестокрилатии Серафими;

Радуйся, Еяже преблагому покрову и мы,
земнороднии благодарне покланяемся.

Радуйся, Богородице, Ризою Твоею от злых
наветов нас покрывающая.

Кондак 2

Видеша святые Твоя родители, Иоаким и Анна,
яко Ты еси, Пречистая, плод благословенный
будеши, возблагодариша Бога и пред дверьми
храма даша обет: посвятити Тя Господеви, да
навыкнеши пети Ему: Аллилуиа.

Икос 2

Разум совершенный стяжала еси, Богородице,
воспитанием во Святая Святых. Тако не
престаеши умудряти и просвещати светом
Богоразумия и вся Христианы, вопиющия Ти
таковая:

Радуйся, премилосердая Утешительнице всех
скорбящих и обремененных;

Радуйся, неусыпающая Наставнице всех

заблудших и ослепленных.

Радуйся, праведно движимый гнев Божий на нас Твоим молением скоро утоляющая;

Радуйся, злая страсти наша всемошным мановением укрощающая.

Радуйся, крепкое возбуждение спящих совестей;

Радуйся, нетрудное преодоление беззаконных навыков.

Радуйся, Еяже ради ад стенет и души злобы трепещут.

Радуйся, Еяже ради врата рая всем нам отверзаются.

Радуйся, Богородице, Ризою Твоею от злых наветов нас покрывающая.

Кондак 3

Сила Вышняго осени Тя, Благодатная, егда Архангел Гавриил благовествовавше о безсеменном зачатии от Тебе Сына Божия, Спасителя миру. Прияв сию Благую весть со смирением, яко раба Господня возопила еси Богу: Аллилуиа.

Икос 3

Имуще во утробе Христа Жизнодавца, востекла еси, Благословенная, к южике Своей, праведной Елисавете. И егда целоваше Тя южика Твоя, взыграл младенец Иоанн во чреве ея и исполнился Духа Свята Елисавет и прослави Тя,

да и мы вопием Тебе тако:

Радуйся, царств православных несокрушимая крепосте и оградо;

Радуйся, святых храмов и алтарей первейшее украшение.

Радуйся, почитающих Тя, вернейшее ограждение;

Радуйся, благосердных христиан неусыпающая Споспешнице.

Радуйся, непобедимая Воводо к Тебе прибегающих;

Радуйся, святое зеркало правды судиям немздоприимным.

Радуйся, совершенный Разуме наставников и детоводителей;

Радуйся, благословение домов и семейств благочестивых.

Радуйся, Богородице, Ризою Твоею от злых наветов нас покрывающая.

Кондак 4

Буря недоумения смущает наш ум, како возможем недостойными усты восхваляти Тя, Пресвятая Дево, за Твое великое к нам вспоможение. Темже, величая неисчетныя Твоя милости, смиренномудренно поем Вседержителю Богу: Аллилуиа.

Икос 4

Слышаша Вифлеемстии пастырие ангелов,
поющих Христово Рождество, текоша в пещеру
и обретоша тамо Богородительницу, на руках
держашую предвечнаго Младенца. С ними в
веселии духов нем и мы Тебе, яко общей Матери
нашей, глаголем тако:

Радуйся, от Солнца мысленнаго озаренная и нас
светом незаходимым просвещающая;

Радуйся, сиянием пречистыя души Твоея всю
землю просветившая.

Радуйся, чистотою телесе Твоего вся небеса
возвеселившая;

Радуйся, святых обителей Христовых покров и
снабжение.

Радуйся, верных пастырей Церкви бодрость и
вразумление;

Радуйся, богабязненных иноков и инокинь
Наставнице.

Радуйся, невозмущаемое упокоение
благоговейных старцев;

Радуйся, тайное веселие чистых дев и вдовиц.

Радуйся, Богородице, Ризою Твоею от злых
наветов нас покрывающая.

Кондак 5

Боготечною звездою являешися, Царице
Небесная, всем под кров Твой всемогущий

прибегающим и непрестанно в умилении
сердечном вопиющим Богу: Аллилуиа.

Икос 5

Видя праведный Симеон Тя, пришедшую с
младенцем Иисусом во храм представитися
Господеву, рече: «Тебе же Самой душу пройдет
оружие». Проразумевая Матерняя Твоя
страдания о Сыне Твоем Божественней зовем
Ти:

Радуйся, еяже руце поддержит за всех нас
единая Ея к нам любовь и милосердие;

Радуйся, пред Неюже враги наша видимии и
невидимии стояти не могут.

Радуйся, темное полчище страстей и похотей
наших прогоняющая;

Радуйся, огонь Божественный – Христа неопально
на руку Своею держащая, и нас хладных тем
воспламеняющая.

Радуйся, воинствующих на плоть целомудрием
изрядное венчание;

Радуйся, подвизающихся в посте и безмолвии
присное собеседование.

Радуйся, изнемогающих от уныния и печали
скорая Утешительнице;

Радуйся, благодатию смирения и терпения
снабдевающая.

Радуйся, Богородице, Ризою Твоею от злых
наветов нас покрывающая.

Кондак 6

Проповедницы Твоея благодатныя помощи суть все множество Тобою спасенных: страждущих, болящих, от грехов избавленных и благодарственно о Тебе вопиющих: Аллилуиа.

Икос 6

Возсия Божественный свет во Египте, и падоша тамо идоли, егда бежала еси, Пречистая, с Богомладенцем Иисусом, спасаяся от убийства Иродова. Ты убо озаряши светом Боговедения умы всех удаляющихся прелестей суетного мира. Тем же превозносим Тя словесы сими:

Радуйся, Божню Силу и Божию Премудрость — Христа плотию породившая;

Радуйся, юродивую мудрость века сего посрамившая и ослепленных ею на путь правый наставляющая.

Радуйся, святых веры охранение и православных догматов Наставнице;

Радуйся, нечистивых ересей и тлетворных расколов Искоренительнице.

Радуйся, тайная и неудобь предвиденная вся добре ведущая и имже подобает сказующая;

Радуйся, лживых провидцев и суетная гадания посрамляющая.

Радуйся, в час недоумений мысль благу на сердце полагающая;

Радуйся, от пагубных начинаний и

несмысленных пожеланий воспящающая.
Радуйся, Богородице, Ризою Твоею от злых наветов нас покрывающая.

Кондак 7

Хотяще николиже отлучатися от рожденнаго Тобою Спасителя мира, Ты, Богоблаженная, пребывала еси с Ним неотлучно во граде Назарете, детоводя и питая Его яко человека, и поя в сердце Своем, яко Богу: Аллилуиа.

Икос 7

Новую показуя Матернюю любовь к Сыну Твоему, со скорбию искаша Его, двоюнадесятолетня отроча, егда обрела еси Его во Храме, в дому Отца Своего. Ведуще таковое Твое сердоболие со умилением вопием Ти:
Радуйся, нерукотворенный омофор, аки облак над всем миром распростершая;
Радуйся, превечнаго Архиереа, Сына Своего, знамение на руке Своей держащая.
Радуйся, новую милость и новую благодать сим в Церкви Православней являющая;
Радуйся, столпе облачный, от искушений и соблазнов мира всех нас покрывающий.
Радуйся, столпе огненный, среди мглы греха всем нам путь спасения показующий;
Радуйся, явных благочестия подвижников явное укрепление.

Радуйся, тайных среди мира рабов Божиих
тайное вразумление;
Радуйся, и мене, обнаженнаго добрых дел,
неоставляющая Своим покровом и благодатию.
Радуйся, Богородице, Ризою Твоею от злых
наветов нас покрывающая.

Кондак 8

Странное и предивное есть Твое, Богомати,
попечение о христианах на всех путех их жизни,
многомятежней и многотрудней. Имея в Тебе
столь милосердную и независтную Помощницу,
все облагодетельствованныи Тобою велегласно
поют Богу: Аллилуиа.

Икос 8

Вся была еси со Христом при служении Его роду
человеческому, како и Божественный
Евангелист Лука извествует о Тебе, глаголя:
Мати Твоя и братия Твоя, вне стоят, видети Тя
хотяще. Веруем, яко Ты, Всеблагая Мати,
неотступно пребываеши и со всеми
труждающимися во славу Божию и
восхваляющими Тя тако:
Радуйся, Ковчеже Завета, в нем же хранится
освящение всего рода человеческого;
Радуйся, стамно Пресвятая, в нейже алчущим
правды блюдется Хлеб Жизни Вечныя.
Радуйся, сосуде всезлатый, в немже уготовася

нас ради плоть и кровь Божественнаго Агнца;
Радуйся, оставленных врачами на Свои
всемощныя руке приемлющая.

Радуйся, расслабленных телом, но не духом и
верою со одра болезни воздвигающая;

Радуйся, погубляющим от недуга ум новый и
лучший смысл подающая.

Радуйся, на стропотнем пути греха и страстей
нас премудре запинаящая;

Радуйся, жестокость нераскаянного сердца
нашего умиляющая.

Радуйся, Богородице, Ризою Твоею от злых
наветов нас покрывающая.

Кондак 9

Всяк возраст верных изобилует Твоим
попечением, Всемиловитая Мати, яко всегда
потребное в житии даруеши и усердно за ны
немощныя и грешный у Престола Господа Славы
ходатайствуешь Ему же поем: Аллилуиа.

Икос 9

Ветия многовещанная не могут глаголати Твоея
Матерняя печали при Кресте Сына Твоего
бывшия, тем же, яко искушенной всячески,
спострадати в самых тяжких скорбех и
лишениях наших могущей, взываем Ти:

Радуйся, от язвы и всегубительства смертнаго
нас соблюдающая;

Радуйся, от внезапнаго колебания земли грады и веси сохраняющая.

Радуйся, от разливания вод и потопления рукою крепкою возводящая;

Радуйся, от западения огненнаго рососою молитв Твоих избавляющая.

Радуйся, от глада душевнаго и телеснаго Хлебом Жизни снабдевающая;

Радуйся, удары молнии и грома от главы нашей отводящая;

Радуйся, от нашествия иноплеменник и тайных убийц спасающая;

Радуйся, от домашня брани и вражды единокровных миром и любовью ограждающая.

Радуйся, Богородице, Ризою Твоею от злых наветов нас покрывающая.

Кондак 10

Спасти хотя мир, иже всех Господь сый, на Кресте вися, дарова Тя всему-Пресвятую и Премудрую Матерь, егда изрек Тебе: «Се сын Твой», и возлюбленному ученику: «Се Мати твоя». Благодаряще за сие Всеблагаго Бога, глаголем Ему: Аллилуиа.

Икос 10

Стена крепкая явилася еси по завету Господа, Преблагословенная, даруя всем благоденствие, мир, отраду, радость, яко и Сама сие пер вее

получила от Воскресшаго Христа Спасителя,
услышав от Него приветственный глас
"Радуйся". Сего ради и мы ублажаем Тя тако:
Радуйся, чистых руками и сердцем земледельцев
благословенными плодами венчающая;
Радуйся, помощи и праведное мздовоздаяние
всем право куплю деющим.
Радуйся, клятвопреступлений и неправедных
стяжаний всенародное обличение;
Радуйся, бедствующим в пути, на суше и водах
внезапное вспоможение.
Радуйся, безчадных родителей плодами веры и
духа веселящая;
Радуйся, безматерных сирот незримая
Воспитательнице.
Радуйся, крепкая Заступнице сущих в плену и
изгнании;
Радуйся, неусыпающая Попечительнице во узах
и темнице сидящих.
Радуйся, Богородице, Ризою Твоею от злых
наветов нас покрывающая.

Кондак 11

Пение наше смиренное от полноты любве и
усердия Тебе приносимое не презри,
Богоневесто, и не отвратися от нас грешных и
недостойных, но помози нам очиститися от
всякия скверны плоти и духа; да возможем
достойно пети Богу: Аллилуиа.

Икос 11

Светом руководствующим была еси Апостолом,
Богородительнице, по Вознесении Сына Твоего
на небо, и до сего дне свет благодати изливаеши
от Иконы и Ризы Твоей честней всем
притекающим к Ней с желанием спастися и в
разум истины прийти. Не лиши и нас, о,
Всеблагая, Твоего Святого водительства в море
житейском бед и скорбей обуреваемых, обаче от
сердца приносящих Тебе благохваления таковая:
Радуйся, всех даров духовных и телесных
независтная Подательнице;
Радуйся, полагающих начало покаяния
грешников верная Предстательнице.
Радуйся, борющихся со страстями и прилогами
вражиими всегдашняя Споборнице;
Радуйся незримое укрощение владык жестоких
и зверонравных;
Радуйся, тайный покое и отрадо рабов кротких
и страждущих;
Радуйся, всежеланное совершение благих
супружеств.
Радуйся, матерей детородящих скорое и
безболезненное разрешение;
Радуйся, в час кончины единая всем нам
Помощнице.
Радуйся Богородице, Ризою Твоею от злых
наветов нас покрывающая.

Кондак 12

Благодать Божественную испроси нам у Сына Твоего и Бога, Всепетая Богородице, простри руку помощи, да не погиб нем во гресех и лютых обстояниях, находящих на ны, от враг видимых и невидимых, умири наша сердца, злобою и враждою исполненныя, да утешении Тобою, радостно воззовем Богу. Аллилуиа.

Икос 12

Поюще истинное Твое Успение, прославляем и милость Твою, Владычице, юже явила еси в Ризе Твоей честной, заветав Ю по Успении некоей вдовице, Тебе при жизни служившей, и чрез ню явившей Покров Твой святыи и благодатныя исцеления и всем людям притекающим к Тебе и Тя прославляющим:

Радуйся, всей вселенней крепкое заступление;
Радуйся, всех стихий земных и небесных освящение.

Радуйся, всех времен года благословение;
Радуйся, всех наветов и искушений, от мира, плоти и диавола находящих, поправление.

Радуйся, нечаемое примирение ожесточенно враждующих;

Радуйся, неведомое исправление нераскаянных грешников.

Радуйся, не отвергающая всеми презренных и отверженных;

Радуйся, самых отчаянных от ров а погибели изхищающая.

Радуйся, Богородице, Ризою от злых наветов нас покрывающая.

Кондак 13

О Всепетая Владычице мира, прими сие малое благодарение от всего сердца Тебе приносимое, и не попусти николиже охладивати в благодарнем сем чувстве, но вразуми нас всегда помнити Твоя неисчетныя милости и со слезами умиления вопити о Тебе Богу: Аллилуиа.

Этот Кондак читается трижды, затем 1-й Икос: Ангельский глас ... и 1-й Кондак: Взбранной Воеводе ...

Молитва

О, Препоблагословенная Дево, Владычице Богородице, зрим ныне залог Твоих милостей к роду христианскому и светло празднуем днесь честныя Твоя Ризы положение, яко благоволила еси в сей Ризе открыть нам тайну благодатной помощи и заступления всем благоговейно к Тебе прибегающим и сердца свои пред иконою Твоею в молитве изливающим.

Приими, Всеблаготворная Владычице Богородительнице, сия дары, Тебе Единой прикладныя от нас недостойных рабов Твоих, от всех родов избранная, всех тварей небесных и

земных высшая являющаяся. И ныне, Всепетая Пресвятая Богородице, не престай молящися о нас, еже избавитися нам от всякаго обстояния и навета злых человек Ризою Твоею, и сохранитися нам неврежденным от всякаго ядовитаго прилога вражия силою молитв Твоих, яко да Твоим заступлением и благодатной помощью честныя Ризы Твоея спасаеми славу, хвалу, благодарение и поклонение за вся, в Троице Единому Богу и всех Создателю возсылаем ныне и присно и во веки веков. Аминь.

